

**VENDIM**  
**Nr. 745, datë 5.9.2013**

**PËR KRIJIMIN E QENDRËS SHUMËFUNKSIONALE TË ARSIMIT DHE FORMIMIT  
PROFESIONAL NË KAMËZ, DHE FUNKSIONIMIN E SAJ GJATË  
PERIUDHËS KALIMTARE 2013 – 2018**

Në mbështetje të nenit 100 të Kushtetutës, ligjit nr. 8872, datë 29.3.2002 “Për arsimin dhe formimin profesional në Republikën e Shqipërisë”, të ndryshuar, të shkronjës “b” të nenit 7 të ligjit nr. 69/2012 “Për sistemin arsimor parauniversitar në Republikën e Shqipërisë”, dhe të ligjit nr. 10 247, datë 4.3.2010 “Për kornizën shqiptare të kualifikimeve”, me propozimin e Zëvendëskryeministrit dhe Ministër i Arsimit dhe Shkencës, Këshilli i Ministrave

**VENDOSI:**

1. Krijimin e Qendrës Shumëfunktionale të Arsimit dhe Formimit Profesional (QSHAFP) në Kamëz, mbi bazën e Shkollës së Mesme Profesionale Kamëz, si një institucion publik për arsimin dhe formimin profesional (AFP), që gëzon statusin e personit juridik, të veçantë për drejtimet e veprimtarisë, që përcaktohen në këtë vendim.

2. Misioni i QSHAFP-së Kamëz është të sigurojë:

- a) arsim dhe formim profesional për nivelet I – III të AFP-së;
- b) arsim profesional të avancuar pas arsimit të mesëm me frekuentim të plotë në shkollë ose të integruar me praktikë në vendet e punës në kompani (forma duale e AFP-së);
- c) kurse formimi për të rritur sipas nevojave të tregut të punës.

3. QSHAFP-ja Kamëz ka këto funksione kryesore:

a) Të sigurojë arsim dhe formim profesional të mesëm dhe pas të mesëm me frekuentim shkollor të plotë dhe të pjesshëm ose të formës duale, arsim dhe formim profesional të integruar me praktikën në shoqëritë tregtare;

b) Të mbështesë të diplomuarit pas përfundimit të studimeve, që të hyjnë në tregun e punës, duke bashkëpunuar me Shërbimin Kombëtar të Punës (SHKP), partnerët socialë dhe shoqëritë tregtare;

c) Të nënshkruajë marrëveshje me shkolla të arsimit dhe formimit profesional dhe me qendra homologe që funksionojnë jashtë vendit, në përputhje me legjislacionin në fuqi, për shkëmbimin e dijeve të nxënësve, duke informuar Ministrinë e Arsimit dhe Shkencës;

ç) Të bashkëpunojë me sipërmarrjet ekonomike, organizmat socialë dhe shoqëritë tregtare partnere (si për sistemin me frekuentim të plotë dhe të pjesshëm, ashtu edhe për atë dual);

d) Të sigurojë certifikata dhe diploma për të rinj e të rritur në fushat përkatëse të arsimit dhe formimit profesional, pas përfundimit me sukses të programeve të ndryshme të AFP-së, në përputhje me legjislacionin në fuqi.

4. QSHAFP-ja kalon një periudhë kalimtare, që zgjat 5 vjet (2013-2018), gjatë së cilës organizohet në departamente të arsimit dhe formimit profesional, të cilat janë njësi bazë të mësimdhënies. Propozimi për hapjen ose mbylljen e një departamenti bëhet nga bordi i drejtimit, me miratimin e Ministrit të Arsimit dhe Shkencës.

5. QSHAFP-ja, gjatë periudhës kalimtare, e mbështet veprimtarinë në ligjin nr. 8872, datë 29.3.2002 “Për arsimin dhe formimin profesional në Republikën e Shqipërisë”, të ndryshuar, ligjin nr. 69/2012 “Për sistemin arsimor parauniversitar në Republikën e Shqipërisë” dhe ligjin nr.10 247, datë 4.3.2010 “Për kornizën shqiptare të kualifikimeve”, në statut dhe në këtë vendim.

6. Statuti i QSHAFP-së, për periudhën kalimtare, miratohet nga Ministri i Arsimit dhe Shkencës.

7. Gjatë fazës kalimtare, bordi i QSHAFP-së quhet bordi i drejtimit. Detyrat dhe funksionet e tij përcaktohen me udhëzimin përkatës të Ministrit të Arsimit dhe Shkencës dhe Ministrit të Punës, Çështjeve Sociale dhe Shanseve të Barabarta, i përshtatur gjatë fazës kalimtare, sipas kërkesave të veçanta të QSHAFP-së.

8. Mënyra e organizimit dhe e funksionimit të bordit të drejtimit dhe sekretariatit të tij përcaktohet me rregulloren e brendshme të QSHAFP-së, të hartuar nga anëtarët e bordit dhe të miratuar nga Ministri i Arsimit dhe Shkencës.

Mandati i anëtarëve të bordit të drejtimit është i kufizuar deri në përfundim të fazës kalimtare.

9. Marrëdhëniet e punës së personelit mësimdhënës të QSHAFP-së rregullohen me ligjin nr. 7961, datë 12.7.1995 “Kodi i Punës së Republikës së Shqipërisë”, të ndryshuar.

10. QSHAFP-ja Kamëz financohet nga Buxheti i Shtetit, si dhe nga burime të tjera të ligjshme, brenda fushave të veprimtarisë së saj.

11. QSHAFP-ja Kamëz vepron si njësi ekonomike me llogari më vete, sipas legjislacionit në fuqi. Ajo kryen veprimtari ekonomike jo për qëllime përfitimi, por vetëm me synim realizimin e shërbimeve arsimore dhe të formimit profesional sipas legjislacionit në fuqi.

12. QSHAFP-ja Kamëz ka të drejtë të krijojë dhe të përdorë në mënyrë të pavarur 100% të të ardhurave financiare që rezultojnë nga aktivitete kryesore dhe dytësore, si edhe nga bashkëpunimi me palët e treta vendase apo të huaja, bazuar në legjislacionin në fuqi. Ajo mund të krijojë të ardhura financiare në mënyrë të pavarur, përmes tarifave të shërbimeve për kurset afatshkurtra të programeve të ndryshme të AFP-së, kur ka kërkesë nga palët e treta, bazuar në legjislacionin në fuqi. Tarifat për shërbimet që do të ofrojë QSHAFP-ja Kamëz, miratohen me udhëzim/urdhër të përbashkët të Ministrit të Financave dhe Ministrit të Arsimit dhe Shkencës.

13. Të gjitha aspektet e funksionimit të QSHAFP-së Kamëz, gjatë periudhës kalimtare, të cilat nuk janë parashikuar në këtë vendim, rregullohen në bazë të legjislacionit në fuqi dhe statutit të kësaj qendre.

14. Struktura dhe organika e QSHAFP-së miratohen nga Ministri i Arsimit dhe Shkencës, brenda numrit të punonjësve të miratuar për Shkollën e Mesme Profesionale Kamëz.

15. QSHAFP-ja ushtron veprimtarinë në mjediset e Shkollës së Mesme Profesionale Kamëz dhe, për të plotësuar standardet e nevojshme për mësimdhënie, përdor bazën materiale, didaktike dhe laboratorët e kësaj shkolle.

16. Efektet financiare që rrjedhin nga zbatimi i këtij vendimi, të parashikuara për mbulimin e pagave, sigurimet shoqërore, shpenzimet për blerje materiale e shërbimesh, si dhe fondet për investime, përballohen nga buxheti vjetor i miratuar për Ministrinë e Arsimit dhe Shkencës.

17. Në fund të periudhës kalimtare, Ministri i Arsimit dhe Shkencës propozon akte të mëtejshme nënligjore për funksionimin e mëtejshëm të QSHAFP-së.

18. Ngarkohen Ministria e Arsimit dhe Shkencës, Ministria e Punës, Çështjeve Sociale dhe Shanseve të Barabarta dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**KRYEMINISTRI**  
**Sali Berisha**